

# Årsrapport for LNK 2023

*Annakvart år, i samband med årsmøtet og landstinget i LNK, legg organisasjonen fram ei fyldig årsmelding og revidert rekneskap for dei siste to driftsåra. Dei åra det ikkje er årsmøte og landsting dokumenterer LNK aktiviteten sin gjennom ein enklare årsrapport. Styret vurderer det slik at denne rapporten, saman med revidert rekneskap for meldingsåret, gjev eit godt bilete av drifta i organisasjonen.*

Det har vore stor aktivitet i LNK i jubileumsåret vårt 2023. Nettstadene våre har nådd nær éin million brukarar i løpet av året. Framtidajunior.no blei kåra til Årets nynorskbrukar av Nynorsk kultursentrum på Festspela, og har opplevd rekordmange deltakarar i skrivekonkurransane sine. Framtida.no har lansert ein ny debattportal og ny nettside. I vår lanserte LNK eit flunkande nytt digitalt nynorsk kurs for lærarar – og berre to gonger før har LNK arrangert fleire fysiske På saklista-kurs.

Talet på medlemsbesøk har tatt seg opp, og for første gong deltok LNK på Nynorskstafetten saman med Noregs Mållag. Dette var i Nord-Gudbrandsdalen.

I det følgjande kan du lesa meir om aktivitetane til LNK i løpet av 2023.

## **30-årsjubileum og landsting**

LNK arrangerte landsting på Quality Sogndal Hotell 1.–2. juni 2023, og markerte samstundes 30-årsjubileum. Kommunal- og distriktsminister Sigbjørn Gjelsvik heldt helsingstale, og det same gjorde fylkesordføraren under middagen.

Tinget samla om lag 64 deltakarar. I tillegg deltok ein klasse ved Sogndal vidaregåande skule torsdagen.

Landstinget hadde seks hovudtema:

- Robotane kjem! Korleis kan språkteknologi hjelpa kommunane?
- Innkjøpsmakt og språkmakt i kommunane
- Identitetsskapande merkevarebygging
- Korleis kan kommunane nå dei unge?
- Nynorskpolitikk og språkbruksplanar i kommunane

Stig Ulv sytte for ein artig og fin konsert i Sogndal kulturhus. Landstinget vart arrangert av LNK i samarbeid med Sogndal kommune, Vestland fylkeskommune og organisasjonen Nynorskfylket Vestland.

## **Framtida.no**

LNK har ansvar for drifta av Framtida.no, men redaksjonen er heilt uavhengig og styrer etter Redaktørplakaten og Ver varsam-plakaten. Nyhende- og debattavisa for unge lanserte den ny debattportal og nye nettsider i 2023.

Framtida og Magasinet-redaksjonen tel i 2023 fire årsverk, i tillegg til dyktige vikarar og sommarvikarar.

Framtida.no har i 2023 hatt **802 719 brukarar**. Trafikken frå læreplattformer har halde fram med å auka og syner behovet for gode nynorske tekstar til bruk i undervisning.

20. juni 2023 gjekk Framtida.no over til Google Analytics 4, som erstatta Universal Analytics.

Etter overgangen til Google Analytics 4 har 60,5 prosent av trafikken kome frå mobil, medan det resterande kjem frå desktop og tablet.

- 47 prosent av treffa våre kome som resultat av organiske søk.
- 25 prosent av brukarane vert vist vidare til sida frå ei anna kjelde. Her ligg mellom anna siteringar frå andre medium og trafikk frå læringsplattformer.
- 19,4 prosent av trafikken kjem direkte frå framsida til Framtida.no.

I september fekk Framtida.no nye nettsider, designa av Blåis AS. Desse er utforma for å betre treffa unge i alderen 15–25 år og gjera journalistikken vår meir tilgjengeleg for ulike typar lesarar.

Oppdateringa er ein del av prosjektet «Nye måtar å kommunisera med fleire lesarar». Prosjektet fekk innovasjonsstøtte av Medietilsynet og har resultert i ein ny debattportal for innsending av meningsinnlegg, meir tilgjengelege nettsider og nyheitsbrevet Vekas viktigaste.

Den nye debattportalen til Framtida.no og Magasinet har fått inn 102 innlegg og skrivekonkurransbidrag sidan lanseringa 20. april 2023. I tillegg har me fått inn mange gode meningsinnlegg via [tips@framtida.no](mailto:tips@framtida.no).

Eitt av dei innsende meningsinnlegga resulterte i nyheitsartikkelen [Reidun \(23\) avbestilte sjukehustime – fekk Vipps-krav på 1500 kroner](#), som var den tredje best leste artikkelen på Framtida.no i 2023.

Saka til Reidun Bergland (23) vart òg [løfta på Stortinget av Marian Hussein \(SV\) og helseministeren lova at den varsla evalueringa ville koma](#).

Lesarinnlegget som er sendt inn via portalen og har fått flest lesarar er 15 år gamle Elisa Skogrand si tekst om aldersgrenser i sosiale medium. [«Å gi tilgang til sosiale medium til ein](#)

[10-åring, er som å gi ein hund kattemat. Heilt feil.»](#) var blant juryane sine favorittar i Framtida.no, Magasinett og Nynorsksenteret sin skrivekonkurranse «Grenser i ei digital verd».

Her kan du sjå lista over dei [10 mest leste Framtida-sakene i 2023](#).

Fleire av sakene på topplista vår kjem frå journalistiske prosjekt me har fått støtte til å gjennomføra. I 2023 har Framtida.no fått støtte til og gjennomført følgjande prosjekt:

- [Minoritet og makt](#) – 100 000 kroner frå Fritt Ord
- [Dei unge grekarane](#) – 40 000 Fritt Ord
- [Ung og kritisk](#) – 50 000 kroner frå Sparebankstiftelsen DNB
- [Ein menneskerett – menneskerettane 75 år – temaavis med Framtida Junior](#) – 40 000 kroner frå Fritt Ord
- [Den sørkoreanske identiteten](#) – 60 000 kroner frå Fritt Ord

### **Framtidajunior.no**

I 2023 har over 112.000 brukarar vore innom Framtidajunior.no – ein liten nedgang frå 2022. Totalt sidan oppstarten 17. oktober 2017 har over 640.000 brukarar vore innom nettsidene våre.

Framtidajunior.no blir mykje brukt i skulen, men nettstaden blir også mykje brukt i fritida.

Framtidajunior.no har gjennomført fem [skrivekonkurransar](#) i 2023. Totalt har det kome inn over 1050 bidrag frå barn over heile landet, noko som er ny rekord. Dei beste tekstane er publisert på [meiningar-sidene](#) til Framtidajunior.no.

I 2023 har me publisert 620 artiklar på Framtidajunior.no og 15 kvissar. Sidan starten 17. oktober 2017 er det publisert over 3700 artiklar og 200 kvissar.

Framtidajunior.no blei i 2023 tildelt prisen Årets nynorskbrukar av Nynorsk kultursentrum under Festspela. Prisen er på 100.000 kroner.

Framtida Junior fekk for første gong støtte av Fritt Ord i 2023. Støtta på 100.000 kroner gjekk til prosjektet «Unge stemmer i lokalvalet». Me laga ein artikkelserie og ei temaavis om forskjellar i kommune-Noreg og korleis det påverkar skule-, kultur- og fritidstilbod. Me skreiv om barnefattigdom og forskjellar – og om korleis barn og unge kan vera med på å påverka og om unge som engasjerer seg. I tillegg arrangerte me ein skrivekonkurranse der over 150 barn skreiv om saker som engasjerer dei.

### **Framtida Junior – papiravis**

I samarbeid med Hallingdølen, Hordaland, Os og Fusaposten, Sogn Avis, Sunnhordland og ABC Startsidene driv me papiravisa Framtida Junior. Avisa kjem ut kring ein gong i månaden til abonnentar over heile landet. Målet er at inntektene frå abonnementssal vil gi eit bidrag til

meir journalistikk på nynorsk for barn gjennom Framtida Junior. Avisene har allereie bidratt mykje inn i samarbeidet, med både marknadsføring og innhald til papiravisa.

Talet på abonnentar har vore aukande.

### **Lesedigg og Lesedigg-klubben**

I 2023 har Framtida Junior samarbeidd med Nynorsk kultursentrum, Nynorsksenteret og seksjon for bibliotekutvikling i Vestland fylkeskommune om å vidareutvikla den digitale teneste som skal hjelpe barn å finna kjekke bøker å lesa.

Hausten 2023 starta me eit samarbeid med Høgskulen på Vestland og Stord folkebibliotek om ein leseklubb for barn frå 4.–6. trinn; Lesediggklubben. Klubben arrangerer fleire opne samlingar i biblioteket der me les høgt, snakkar om bøkene med barna og gjer ulike aktivitetar til bøkene. Prosjektet har mål av seg til å skapa ein modell for korleis ein kan skapa leselyst og få meir aktivitet i biblioteka.

**Les gjerne lesarbrevet til Lesediggklubb-medlem Salomon (9): [Vil ha lesediggklubb fleire plassar i Noreg](#)**

### **Økonomi**

Ingen andre nynorsktiltak når så mange brukarar for så lite pengar som Framtida.no. Me er svært glade for at støtta frå Kulturdepartementet på vel 1,5 millionar kroner til Framtida.no og Framtidajunior.no held fram.

Samarbeidsavtalen med KLP har gjeve LNK ei inntekt på 300.000 kroner, og samarbeidsavtalen med Fagforbundet har gjeve LNK ei inntekt på 400.000 kroner. Støtta har blitt brukt til å gi gratis språkkurs for tilsette i medlemskommunane, og støtta nettsatsingane våre.

ABC Startsidan har støtta Framtida.no med 250.000 kroner.

Me er svært glade og takknemlege for alle andre som har støtta drifta vår i løpet av året som har gått.

Framtidajunior.no og Framtida.no har òg blitt støtta av Utdanningsdirektoratet gjennom Magasinett.

Framtida.no-redaksjonen har òg hatt ansvar for drifta av Pirion.no og Magasinett.

LNK har òg hatt nokre inntekter frå debattkurs og leiing av debattar, samtalar og bokbad. LNK har bidratt med prosjektleiing og kursing av ungdommar i samband med Moster 2024-jubileet.

### **Kursverksemd**

I meldingsåret 2023 gjennomførte me 14 kurs i medlemskommunane våre, eitt mindre enn rekorden vår. Me har halde kurs i alle kommunar som har bede om det, og har marknadsført

kursa på nettsidene våre, i nyhendebrev, på e-post til kommunane og på medlemsbesøka me har gjennomført.

Før sommarferien fekk Austevoll og Bjørnafjorden eit kurs tilpassa plan- og reguleringsavdelingane deira.

Fretland & Fretland har fått auka kapasitet til å ha kurs, og til neste år planlegg me eit kurshaldarkurs for interesserte i medlemskommunane, Ryfylke IKS og interesserte blant eigne tilsette.

Me ser at det kjem stadig nye kommunar som er interesserte i kurs, samstundes som fleire kommunar har kurs kvart år. Med den så pass store interessa for kursa, kan det ligga an til at interessa blir større enn me har budsjett for i 2024. På styremøtet vårt i desember vedtok styret å utvida budsjettet med 50.000 kroner, samstundes som me innfører ein eigendel på 25 prosent av kurskostnaden. For to år sidan auka ramma med 100.000 kroner. Det kan vera vanskeleg å auka budsjettposten noko særleg meir utan at det går ut over drifta elles.

Fretland & Fretland AS i Lærdal har sidan 2020 hatt ansvaret for utvikling, innsal og gjennomføring av kursa til LNK. Dei melder om at enkelte av kurs av og til har ein del avmeldingar, som gjer at det kunne vera plass til fleire på kursa. Ein eigendel kan bidra til at fleire vil prioritera å ta kurs dei har meldt seg på.

Kursboka for På saklista-kurset er framleis På saklista. Språk og saksbehandling på papir og nett av Jan Olav Fretland. Deltakarar oppfattar «På saklista» som både eit språkkurs, eit saksbehandlingskurs og eit klarspråk-kurs. Tilbakemeldingane deira er svært gode, og dei legg vekt på nytten av kurset i den kommunale kvardagen. Kursa går over to dagar.

Kurset for lærarar «På tavle og på skjerm» bruker boka Rett & Godt (Søyland/Fretland) som kurshefte.

På oppdrag frå Bergen kommune lanserte LNK i september eit ope og gratis digitalt nynorskkurs for lærarar. Kurset er utvikla av Jan Olav Fretland, tidlegare dosent ved Høgskulen på Vestland, og ein nestor innanfor nynorskdidaktikken. Kurset er sett saman av fleire videoar og oppgåver som deltakarane får løysa digitalt.

### **Nynorsk og digitale læremiddel**

Våren 2023 jobba LNK tett saman med resten av nynorskrørsla for å gjera opplæringslova best mogleg for nynorskelevane. LNK og Noregs Mållag fekk 121 ordførarar frå både nynorsk-, bokmåls-, og språknøytrale kommunar til å stilla seg bak oppropet for like vilkår for nynorsk- og bokmålselevar, og for å leggja «læringsressursar som er laga for bruk i opplæringa» inn under parallell-kravet om bokmåls- og nynorskversjon. Berre slik kan nynorskelevane få ein skulekvardag på språket sitt.

Tidlegare var det relativt lett å kontrollera at staten følgde opp pliktene sine på dette området, men læremiddel er ikkje lenger berre bøker. Digitaliseringa har kome for fullt, også

i skulen. Samstundes tar ikkje utviklarar og leverandørar av appar og programvare ansvar for språk i produkta sine. Nokre kommunar har gjort vedtak om at dei ikkje vil kjøpa inn programvare som ikkje finst på nynorsk, men i praksis er dette vanskeleg når det ikkje finst tilsvarende relevant programvare på nynorsk, av og til heller ikkje på bokmål. Sidan krav frå kommunane til enkeltleverandørar i praksis gjer lite inntrykk på store internasjonale konsern, bør kommunane halda fram med å stilla krav til Kunnskapsdepartementet om at digitale læringsressursar kjem inn under Opplæringslova, gjennom ei forskrift eller ei lovendring.

Den nye opplæringslova blei vedtatt før sommarferien 2023. Lova er ikkje god nok for lærarane og nynorskelevane. Språkdeling i ungdomsskulen og krav om nynorske skriveprogram er veldig bra. Men fleirtalet på Stortinget vedtok lova utan eit viktig krav: å ta med læringsressursar som er laga for bruk i opplæringa inn under parallell-kravet om bokmåls- og nynorskversjon

Ei samla målrørsle, Forleggerforeningen, Utdanningsforbundet, Elevorganisasjonen og Språkrådet stiller seg bak dette kravet. Stortingsfleirtalet gjeikk ikkje inn for dette, men Utdanningskomiteen har gitt regjeringa beskjed om å henta inn meir kunnskap om situasjonen. LNK har allereie gjennomført fleire undersøkingar om den digitale situasjonen for skulane og elevane i nynorskområde, og har delt desse med Utdanningsdirektoratet. Me vil halda fram med å jobba for at det vert utvikla fleire digitale læremiddel, læringsressursar, appar og meir relevant programvare på nynorsk og for at det blir stilt krav i lov eller forskrift om dette.

## **Språkplanar**

Mal for kommunal språkplan er teken ut av den siste utgåva av «På saklista»- kursheftet. Ein ny og sterkt oppdatert versjon av LNK-malen er tilgjengeleg på LNK.no. Det er også laga ein eigen mal for språkdelt kommunar som ønskjer å vera reelt språknøytrale. Dosent emeritus Jan Olav Fretland ved Høgskulen på Vestlandet (HVL) har hatt ansvaret for begge dei nye malane.

Å støtta medlemskommunane med å laga språkbruksplanar er eit viktig arbeid for LNK. LNK har det siste året vore i kontakt med fleire kommunar med råd til arbeidet med språkplanar. LNK har vore i fleire med møte Vestland fylkeskommune og kome med skriftlege innspel til arbeidet deira med retningslinjer for språkbruk i Vestland fylkeskommune.

Vinteren 2023 avslutta LNK og Nynorsk kultursentrum ei undersøking mellom kommunane i nynorskområde. Av dei 75 kommunane som svara, var det 38 kommunar som svara at dei ikkje har vedtatt nokon språkbruksplan, språkprofil eller handlingsplan for språk. 28 har vedtatt ein slik språkplan, medan ni kommunar ikkje veit dette. 18 kommunar svara at det var aktuelt å oppdatera språkplanen deira i den nærmaste framtida.

Når det gjeld tema for innhald i språkbruksplanane i bruk, er krav om rettskriving, administrasjonsspråk og klarspråk det som er mest vanleg. Språkbruk og språkfremming i ekstern kommunikasjon er òg ein del av språkplanane til eit fleirtal av dei som svara. Mindre vanleg er det å nemna språkbruk og språkfremming innan andre delar av kommunal drift, som til dømes innan skule, barnehage, vaksenopplæring og bibliotek. Berre fire kommunar set krav til nynorskkompetanse ved tilsetjing. I stillingsutlysingar opplyser nær 63 prosent av kommunane om administrasjonsspråket i kommunen.

### **Nynorske læremiddel for framandspråklege**

Mangelfull opplæring for framandspråklege er eit tema LNK har hatt på dagsordenen dei siste åra. Mange nynorskkommunar nyttar framleis bokmål som opplæringsmål for framandspråklege. Ifølgje ei undersøking LNK gjennomførte i haust, hadde litt under halvparten av nynorskkommunane opplæring på nynorsk for vaksne framandspråklege. Det talet er LNK ikkje nøgd med.

Eit av argumenta for å velja bokmål som opplæringsmål, er at det finst altfor få læremiddel på nynorsk for denne gruppa, og at det som finst, er for dårleg. Fram til 2019 har tilfanget auka, ikkje minst takka vera det arbeidet Kompetanse Noreg gjer og støtta dei har gjeve. Men sidan 2016 har ikkje Kompetanse Noreg gjeve ny støtte til nynorske læremiddel. Og 54 av 55 kommunar som svara på spørjeundersøkinga til LNK ønskjer betre tilgang på nynorske læremiddel. LNK vil arbeida for at det kjem fleire midlar til fleire læremiddel på nynorsk.

LNK er medlem i ei arbeidsgruppe i Kompetanse Noreg og bidreg der til å setja desse spørsmåla på dagsordenen. I 2021 har Nils R. Sandal og Arnfinn Vigrestad representert LNK i gruppa. Frå 2022 representerer Marit Nerås Krogsæter LNK i denne gruppa.

Slik det er i dag, vert avgjerd om målform for framandspråklege i mange kommunar overlata til rektorane og dei som underviser. Dette meiner LNK er uheldig. Slike saker bør opp på den politiske dagsordenen. Derfor oppmodar LNK kommunepolitikarane om å ta tilbake den politiske styringsretten på dette området. Temaet var oppe på landstinget i 2021, og kjem til å bli arbeidd vidare med framover.

### **Kommune- og regionreformene**

Styret i LNK har arbeidd med språklege konsekvensar av kommune- og regionreformene sidan våren 2014, og har følgd reformprosessen tett. Arbeidet vart formelt avslutta i desember 2020 og sluttrapporten vart då sendt til Språkrådet og til KMD.

1. januar 2020 blei dei tidlegare kommunane Ålesund, Skodje, Ørskog, Haram og Sandøy slått saman til nye Ålesund kommune. Med over 67.000 innbyggjarar blei dette den største nynorskkommunen i landet. Alle kommunane utanom Ålesund var medlem av LNK tidlegare, og også den nye storkommunen blei medlem. Frå 1. januar 2024 er Haram på nytt eigen kommune. I desember vedtok det nye fleirtalet i nye Ålesund kommune å gjera kommunen språknøytral og melda kommunen ut av LNK.

### **Høyringsfråsegner og påverknadsarbeid**

LNK har kome med fleire høyringsfråsegner i 2023. Dei viktigaste er opplæringslova, statsbudsjettet, rapporten etter Ytringsfridomskommisjonen og forslag til omgjerung og forskriftsfesting av tilskotsordninga om grunntilskot til organisasjonar. LNK har òg kome med innspel til leselyststrategien til regjeringa.

LNK har deltatt i møte med politisk leiing i Kulturdepartementet om statsbudsjettet for fleire nynorsktiltak, og i møte med politisk leiing i Arbeids- og inkluderingsdepartementet om støtte til fleire nynorske læremiddel for vaksne innvandrarar.

LNK deltok for første gong i Arendalsveka i år saman med fleire andre nynorskorganisasjonar.

### **Andre verv**

LNK er medstiftar i Nynorsk kultursentrum som har hovudkontor i Ørsta, og avdelingar i Ulvik og Vinje. Nestleiar Gunnar Strøm var rådsmedlem til desember 2023, medan Hallvor Lilleslett er vararepresentant. Då blei dagleg leiar rådsmedlem og Gunnar Strøm varamedlem.

LNK er medstiftar i Nynorsk Avissenter i Førde, saman med Firda Media as og Mediebedriftenes Landsforening (MBL). Dagleg leiar er styremedlem.

LNK er medstiftar i Nynorsk bedriftsforum, og dagleg leiar er styremedlem.

LNK driv Magasinett og Piron med utgangspunkt i langsiktige avtalar med dei to stiftingane. Begge avtalane vart reviderte i 2019. Dagleg leiar i LNK har vore styreleiar i begge stiftingane.

LNK har vore medlem i organisasjonen Nynorskfylket sidan tiltaket vart skipa i Førde i 2015. Etter regionreforma vart organisasjonen ført vidare som Nynorskfylket Vestland, no med fylkeskommunen Vestland som politisk og administrativ pådrivar. LNK er framleis med i organisasjonen, og dagleg leiar har vore med i arbeidsgruppa i forumet.

Dagleg leiar er òg medlem av Fagrådet for fagspråk og språk i samfunn og høgre utdanning hjå Språkrådet. Han er òg personleg valt inn som møtande vara i styret til Det Norske Samlaget, og er i tillegg rådsordførar for Litteraturselskapet Det Norske Samlaget.

LNK er samarbeidspartnar til den nynorske barne- og ungdomsbokfestivalen Falturiltu og dagleg leiar er medlem programkomiteen til Falturiltuseminaret på Høgskulen på Vestlandet.

Dagleg leiar i LNK er med i juryen for Årets nynorskommune. Frå 2022 blei det bestemt at prisen blir delt ut annakvart år. Neste kåring er hausten 2024.

LNK er fast medlem om Forum nynorsk i opplæringa. Dagleg leiar møter fast i dette. I 2023 hadde Utdanningsdirektoratet ansvar for dette. Frå 2024 får òg Språkrådet eit delansvar for dette forumet.

### **Medlemer**



Per 31. desember 2023 var 85 kommunar, tre fylkeskommunar og 18 regionråd/andre IKS medlemmar, men to kommunar og eit selskap i utmeldingsprosess.

Frå 2023 har BKK meldt seg ut, og det er dermed 17 regionråd og IKS som er medlem. Våren 2023 vedtok Vang kommune å melda seg ut, og i desember vedtok det nye fleirtalet i nye Ålesund kommune å gjera kommunen språkøytral og melda kommunen ut av LNK. Utmeldinga skjer etter vedtektene til LNK normalt etter to kalenderår, men styret vedtok i desembermøtet sitt å gå i dialog med nye Ålesund kommune om utmeldinga. Nye Haram kommune er invitert som ny medlem.

Medlemstal var per 31. desember 2019 126, det høgaste medlemstalet i LNK si historie. Av desse medlemene var 104 kommunar, fire fylkeskommunar og 18 regionråd/andre kommunale selskap. Medlemstalet har vore stabilt veksande gjennom fleire år. Grunna samanslåingar som følgje av kommune- og regionreformene vart talet på medlemmer per 1. januar 2020 redusert til 85 kommunar, tre fylkeskommunar og 18 regionråd/andre IKS.

## **Styre**

På Landstinget 2023 gjekk Gunnar Strøm, Magnus Mjør, Kari Våge Gjuvsland, Jarand Felland og Marit Nerås Krogsæter ut av styret, medan Nils Johan Svalastog Garnes, Marie-Helene Hollevik Brandsdal, Øyvind Strømmen, Reidun Sandvik og Iselin Haugo Stavn kom inn. Etter dette har styret i LNK vore sett saman slik:

Styreleiar: Sara Hamre Sekkingstad  
Nestleiar: Nils Johan Svalastog Garnes  
Styremedlem: Hallvor Lilleslet  
Styremedlem: Marie-Helene Hollevik Brandsdal  
Styremedlem: Øyvind Strømmen

Varamedlemer

1. Reidun Sandvik (fast møtande)
2. Iselin Haugo Stavn
3. Kåre Martin Kleppe

Styret har hatt fire styremøte i løpet av året.

## **Økonomi**

Samla rekneskap for 2023 syner eit underskot på 324 597. Dette blir dekt frå eigenkapitalen. Av ein omsetnad på vel 7,6 mill. i 2023 var 3 mill. statstilskot frå Kulturdepartementet, 2 mill. medlemskontingent, medan resten var eigne inntekter; først og fremst prosjekttilskot og annonsesal, i tillegg til tilskot frå samarbeidspartnarane Fagforbundet og KLP-forsikring. Begge desse avtalane vart fornya i 2021 og gjeld no fram til 2025. Ein samarbeidsavtale med Hotell Bondeheimen har ein verdi på om lag 100 000 (gjeld gratis overnatting for tilsette/styre), men denne summen er ikkje synleggjort i rekneskapen. Administrasjonen og Framtida Junior-redaksjonen har gratis lokale hos Mediehuset Sunnhordland i Leirvik på Stord.

## Revisjon

Vekst revisjon i Oslo er vald som revisor for LNK.

## Administrasjon og redaksjon

Dagleg leiar har vore Svein Olav B. Langåker. Rekneskapsfører har vore ECIT Stord.

I 2023 har Framtida.no hatt ein redaksjon på kring fire årsverk. Framtida Junior har hatt vel to journalistiske årsverk.

Redaksjonen har kontor i Oslo og på Stord. Frå mai og ut året har Framtida Junior-journalist Synne Ulltang jobba frå Sør-Korea.

---

Landssamanslutninga av nynorskkommunar (LNK) er ein kultur- og interesseorganisasjon for kommunar, fylkeskommunar og interkommunale føretak. Organisasjonen har som føremål å fremja nynorsk språk og kultur i offentleg verksemd. Alle kommunar, fylkeskommunar og interkommunale føretak som gjer bruk av nynorsk språk i skulen og/eller i administrasjonen, kan verta medlemmer i LNK. Organisasjonen er lokalisert i Oslo. I samsvar med § 3–3 i rekneskapslova er det med dette stadfesta at ein føresetnad om framleis drift er lagd til grunn ved utarbeiding av rekneskapen. Arbeidsmiljøet i LNK er godt. Sjukefråveret er lågt, og det har heller ikkje vore skadar eller ulukker på arbeidsplassen. Kjønnbalansen i leiinga og i styret er god. LNK driv ikkje med aktivitetar som fører med seg ureining av det ytre miljøet.

Oslo, 23.02.2024

Styret i Landssamanslutninga av nynorskkommunar

---

Svein Olav B. Langåker  
Garnes  
Dagleg leiar

---

Sara Hamre Sekkingstad  
Styreleiar

---

Nils Johan Svalastog  
Nestleiar

---

Hallvor Lilleslett  
Styremedlem

---

Marie-Helene Hollevik Brandsdal  
Styremedlem

---

Øyvind Strømmen  
Styremedlem